

## **Protocol**

---

**dalla radunonza generala dalla Surselva Romontscha (SR),  
sonda, ils 31 da matg 2014 allas 15.30 uras  
ella claustra a Mustér**

### **Tractandas:**

1. Avertura e beinvegni
2. Tscharna dils dumbravuschs
3. Protocol
4. Rapport annual 2013
5. Rendaquen 2013
6. Fixar la contribuziun annuala
7. Elecziuns
8. Program da lavur 2014
9. Varia

### **1. Avertura e beinvegni**

Il president dalla SR Vitus Gartmann arva la radunonza cun far in cordial beinvegni a tuts presents, cunzun al president dalla Ligia Romontscha Duri Bezzola, al vicepresident dalla Pro Idioms Francestg Friberg, a Pader Bruno Rieder ed als representants dallas medias.

Pader Bruno Rieder beneventa medemamein ils presents ed admetta era el num digl avat in cordial beinvegni ellas localitads dalla claustra da Mustér che festivescha uonn il giubileum da 1400 onns. Sper igl invit allas occurrenzas da giubileum, presenta pader Rieder la scola gimnasiala.

### **2. Tscharna dils dumbravuschs**

Paul Valentin Solèr vegn elegius sco dumbravuschs.

### **3. Protocol**

Il protocol dalla radunonza generala 2013 ei publicaus silla pagina d'internet dalla SR, [www.surselva-romontscha.ch](http://www.surselva-romontscha.ch), ultra da quei vegn el projectaus vid la preit.

Francestg Friberg giavischa ina midada sut 7 (program da lavur). La "resoluziun" ei buca numnada sco tala ed igl ei era buca menziunau ch'ei setracta da mieds d'instrucziun idiomatics. La resoluziun duei vegnir aschuntada al protocol sco ella ei vegnida approvada dalla radunonza generala. La radunonza va d'accord cull'intervenziun da Francestg Friberg.

Il protocol vegn approbaus unanimamein culla cundiziun dallas midadas suranumnadas.

#### 4. Rapport annual 2013

Il president Vitus Gartmann menziunescha che las grondas discussiuns dils davos onns pertuccont il lungatg d'alfabetisaziun, pia il cumbat politic ed ideologic denter adherents dils idioms e quels dil rumantsch grischun en scola, ha caschunau da bia dispetas enteifer la Romontschia, aschia era ella Surselva Romontscha. Ch'ei ha stuiu dar ina midada enteifer la suprastanza dalla SR ei segiramein era da menar anavos sin quella situaziun e discussiun. Era sch'il meini d'ina gronda part dalla basa dalla SR, ed il meini dalla maioritad dall'anteriura suprastanza eran differentes, havein nus tuts in punct communabel: nus sengaschein tuttas e tuts pil romontsch. Aschia admetta il president in sincer "*Dieus paghi*" ad Annalisa Cathomas ed a ses anteriurs consuprastonts per la lavur prestada e per la lavur ch'els tuts prestan vinavon pil romontsch.

Igl ei en mintga cass in sedustar constant e s'engaschar per nies lungatg mumma sin tut ils camps dalla veta quotidiana. Las incumbensas per mantener e promover il romontsch en in temps da fusiuns politicas, munconza da mieds d'instrucziun egl idiom e preparativas dil *plan d'instrucziun 21* han aschia pretendiu dalla nova suprastanza immediatamein in cumplein engaschi, oravontut politic, ed han absorbau lur energias egl onn vargau.

**Fusiun Glion+:** En buna collaboraziun cun la LR ed en special cun siu secretari general Urs Cadruvi vegn elaborau e surdau ils 31 da matg 2013 alla suprastanza transitorica sco era al niv parlament dalla vischnaunca fusiunada ina posiziun communabla arisguard il diever, la promoziun ed il francar il romontsch ella nova vischnaunca bilinga. Ella nova costituziun communal vegnan ils puncts decisivs dil messadi per gronda part risguardai. Da gronda impurtonza pil futur vegnan la lescha da lungatg e la lescha da scola ad esser. En omisduas caussas giavischa ed offerescha la SR ina stretga collaboraziun cun las instanzas politicas. Quella collaboraziun veva la suprastanza transitorica da Ilanz/Glion empermess, gie schizun giavischau da nus. La realitad ei denton che nus vegnin buc involvai els process, mobein stuein adina reagir sin las decisiuns gia pridadas. Quei ei pli stentus aschia, seigi quei per nus, denton era per ils differentes gremis politics involvai. Aschia ei la SR savens sfurzada da comunicar sur las medias e luvrar intensivamein cul parlament communal per sedustar e far attents tuts sin quei che cuora e passa. Agir fuss meglier che stuer reagar.

La primavera 2014 intervegn la SR ensemen cun la LR e geniturs pertuccai cun success encunter l'aboliziun dalla scoletta romontscha a Glion. Ord motivs nuncapeivels ed inacceptabels dueva la scoletta romontscha, ch'exista dapi decennis a Glion, vegnir serrada sil proxim onn da scola. Quei havess muntau in naufragi total per il svilup dalla scola romontscha ella fracziun da Glion e fuss stau il falliu signal.

**Resoluziun mieds d'instrucziun idiomatics:** Ils 7 d'uost 2013 surdat la SR a Cusseglia governativ Martin Jäger ina resoluziun davart ils mieds d'instrucziun

idiomatics, sin incarica dalla rad.gen. a Vrin, cun la supplica dad instradar ton pli spert la realisaziun dils mieds basigneivels.

**Plan d'instrucziun 21:** En la versiun stipulada actualmein ei il PI21 per la SR inacceptabels, demai ch'el pretenda dils scolars che vegnan alfabetisai egl idiom era cumpetenzas dil rg e da tschels idioms, e quei dalla scoletta entochen la novavla classa. Tenor la SR duei la scola primara en emprema lingia lubir al singul affon dad emprender e francar il lungatg d'alfabetisaziun, quei vul dir il lungatg mumma/dil mintgadi, pia egl idiom. Ellas scolas cun idiom duei RG vinavon haver siu plaz, denton pér el scalem superiur (capientscha passiva).

**Ediziuns:** La SR ha ediu sut l'egida dall'antieriura presidenta Annalisa Cathomas "*Las Praulas*" en fuorma da cudisch e DC, la DVD "*Safari*", sco era cartas da jass e troccas cun logo romontsch.

In cordial engraziament admetta il president a tuttas e tuts consuprastonts per lur grond engaschi e la buna collaboraziun, sco era a tuttas ed a tuts che s'engaschan per nies romontsch.

## 5. Rendaquen 2013

Il cassier Carl Caflisch presenta il quen che siara cun entradas da CHF 63'040.20 ed expensas da CHF 59'709.35, pia cun in gudogn da CHF 3'330.85.

Paul Valentin Solèr presenta il rapport dils revisurs. Silsunter vegn il quen approbaus unanimamein.

## 6. Fixar la contribuziun annuala

Cunquei che beinenqual vischnaunca ha fusiunau el decuors dils davos onns (p.ex. Lumnezia, Glion+) ein las entradas da commembradi da talas sesminuidas per biebein CHF 5'000.- Tenor artechel 5 dils statuts decida la radunonza generala dallas contribuziuns. Ord quei motiv propona la suprastonza dad adattar las pauschalas per vischnauncas suandontamein:

- vischnauncas tochen 600 habitonts: CHF 250.-
- vischnauncas 600 tochen 1'200 habitonts: CHF 500.-
- vischnauncas cun dapli che 1'200 habitonts: CHF 750.-

Per contonscher ina repartiziun pli gesta propona Flurin Maissen ina contribuziun da tschep da CHF 200.- ed ina contribuziun per habitont da p.ex. 20rp. Adelina Vincenz sustegn quella proposta. Dumeni Columberg propona ina taxa minimala entochen 500 habitonts ed ina contribuziun per persuna per pli grondas vischnauncas. Plinavon propona el da fixar las taxas per 5 onns.

Cun gronda maioritad decida la radunonza generala che la suprastonza duei elaborar in model da contribuziuns per vischnauncas cun risguardar: ina contribuziun da tschep ed ina contribuziun per habitont. Quellas taxas dueien valer per 5 onns. La suprastonza vegn a fixar las summas en lur emprema radunonza da suprastonza e

silsuenter dumandar las vischnauncas schebein ellas ein promptas da sustener la Surselva Romontscha tenor il niev model da contribuziuns.

Las ulteriuras contribuziuns restan sco dacheu:

- persunas singulas CHF 30.-
- uniuns, secziuns e pleivs CHF 50.-
- persunas giuridicas CHF 100.-

## **7. Elecziuns**

Entras la mort da signur Duri Sulser ei il post d'in delegau vacants. La suprastanza propona dunna Anne Glantz da Fidaz sco nova delegada.

Entras la mort da dunna Brida Sgier ei in post da suppleant vacants. Plinovon giavischa la suprastanza in augment dils suppleants. Quei per adina saver esser presents cun 15 delegai allas radunonzas. La suprastanza propona Rita Gfeller da Sagogn, Esther Hendry da Mustér e Bistgaun Cathomen da Dardin.

Els vegnan elegi unanimamein.

## **8. Program da lavur 2014**

Igl agir sin palancau politic vegn segir era vinavon ad esser ina impurtonta incumbensa dalla SR.

Sper igl agir ed intermediar pil manteniment e la promoziun dil romontsch en ina situaziun politica fetg difficila e fluctuonta ha la SR era l'incumbensa da promover la litteratura e la cultura romontscha. En quei senn elaborescha ella in cudisch da lectura per il scalem miez en fuorma d'ina translaziun dil cudisch „Vamperl“.

Vinavon possibilitescha la SR alla giuvna scribenta Stella Sennhauser d'edir in cudisch per juvenils.

Sin l'entschatta digl onn da scola 2014/15 sustegn la SR dunna Patricia Cadruvi d'edir in eBook cun 150 receipts da cuschinar per romontsch. Quels receipts dueien buca mo star a disposiziun als scholars, mobein era ad ulteriurs interessents.

Sin impuls d'in commember ha la suprastanza contactau la casa editura "Ravensburger", per sclarir sch'ei dess la pusseivladad d'edir in cudisch auditiv da "TipToi" per romontsch. La risposta ei stada negativa. La suprastanza vegn el decuors d'uonn aunc inaga ad encurir il contact culs responsabels.

## **9. Varia**

Giusep Capaul fa endamen ch'el ha criticau igl atun 2012 l'anteriura suprastanza pertuccont l'elecziun dil president dalla Lia Rumantscha. Dacuort ei serepetiu in semeglient scenari tier l'elecziun dad RTR - puspei negina presenza Sursilvana en in post da clav, ina discriminaziun dalla pli gronda part romontscha. Ella pressa ha

signur Capaul criticau quei fatg ed ha survegniu grond sustegn persunter. Dalla suprastanza dalla Surselva Romontscha less el saver, daco ch'ella ha buca reagau en caussa.

Il president Vitus Gartmann lai saver che la suprastanza seigi duront quei temps stada engaschada fetg ferm cun Glion+. L'elecziun tier RTR era gia fatga e perquei ha la SR concentrau las forzas leu nua ch'ei era aunc pusseivel da contonscher enzatgei.

Claudio Vincenz ei dil meini che l'introducziun dil Romontsch Grischun en scola seigi stau la pli gronda discriminaziun dil pievel. Leu vali ei la peina da cumbatter cun cumplein engaschi.

Duri Bezzola porta ils megliers salids dalla Lia Rumantscha ed engrazia alla suprastanza dalla SR per la buna collaboraziun che ha purtau fretgs.

Francestg Friberg informescha davart la situaziun actuala dils mieds d'instrucziun idiomatics. Grazia allas forzas unidas dalla SR, dallas vischnauncas e da differentas instituziuns - 44 instituziuns han intervegniu, quei ei singular - ha la regenza reagau sin la resoluziun ed installau ina cumissiun sut la bitgetta dalla scola aulta da pedegogia da Cuera. La cumissiun ha astgau presentar il rapport intermediar a signur Martin Jäger ed ei da buna speranza, ch'ins ei quei che pertucca ils mieds d'instrucziun idiomatics sin ina buna via.

Allas 16.50 uras siara il president Vitus Gartmann la radunonza generala engraziand per tut ils votums e per il sustegn ed engaschi da tut ils presents.

Suenter radunonza envida la SR ad ina viseta guidada dil museum, dalla baselgia ni dalla scola dalla claustra sco era ad in pign aperitiv.

Laax, ils 18 da zercladur 2014

l'actura  
Flurina Cantieni